

## Abenduaren 6an **ABENDUALDIKO 2. IGANDEA (B)**

### **Agurra**

Gu salbatzera datorren Jauna izan bedi zuekin.

### **Sarrerako Oharpena**

Gaurko ospakizunean hiru ahots berezi entzungo ditugu: Isaias profetarena, Joan Bataiatzailearena eta Pedrorena: Jaunaren bidea konfiantzaz prestatzea beharrezkoa zaigula hots egiten dute.

Jauna, bidean jartzen den herriarekin doa, bide-erakusle eta bidelagun. Bidea prestatu behar diogu, gurekin etor dadin. Urduritasunik gabe, mesfidantzarik gabe, ezinean goibeldu gabe. Konfiantza osoa izan behar dugu: Jainkoak beteko du hitz eman digun guztia.

**Abendualdiko argia piztea** (*Kantua, liburuxka honetan, 4-5 orrialdeetan*)

**Damu-otoitza** (*Kandelen ezaugarria egiten bada, utzi Damu-otoitza*)

Senideok: aitor ditzagun gure bekatuak, misterio santuak ospatzeko gai izan gaitezen.

—Jesus Jauna, gure bekatu guztien barkamen-iturria zarena: erruki, Jauna.

—Jesus Jauna, guztiok bihotz berritu gaitezen nahi duzuna: Kristo, erruki.

—Jesus Jauna, Espiritu Santuaz bataiatu gaituzuna: erruki, Jauna.

Erruki dakigula Jainko guztiz ahaltsua, eta, gure bekatuak barkaturik, eraman gaitzala betiko bizira.

## Otoitza

**Jainko ahalguztiduna eta errukitsua,  
 lur honetako gauzen ardura ez dezagula eragozpen izan  
 zure Semeari bidera gogotsu irteteko;  
 eta eraman gaitzazu, jainkozko jakinduriaren irakaspenez,  
 zeure Semearekin bat egitera.  
 Zure Seme Jesu Kristo gure Jaunaren bitartez,  
 Zurekin eta Espiritu Santuarekin batean  
 Jainko eta errege bizi baita gizaldi eta gizaldietan.**

## Hitzaren liturgiari oharpena

Kontsolamendua eman eta itxaropena pizten diguten hitzak entzutera goaz. Jainkoak, Artzainik onenaren moduan gidatu nahi gaitu. Bere salbamen indarra gugana irits dadin, ordea, bidea zabaldu behar diogu. Zabal diezaiogun bihotza Jainkoari.

## Lehenengo irakurgaia (Is 40, 1-5. 9-11)

Isaias profetaren liburutik

«Poztu, poztu ezazue nire herria –dio zuen Jainkoak–. Mintza bihotzera Jerusalemi, oihu egiozue: Betea duela morroi aldia, ordaindua gaiztakeria; Jaunaren eskutik hartu duela, bekatu guztien ordain bete».

Mintzo bat ari da oihuka: «Urra ezazue basamortuan bide bat Jaunarentzat; zelaitu eremuan bide zabal bat gure Jainkoarentzat. Gora daitezela haranak, behera, mendi eta muinoak; berdin daitezela malkarrak, zelaitu lur maldak. Eta Jaunaren aintza agertuko da, eta gizaki guztiek ikusiko dute –hala esan du Jaunaren ahoak!–».

Igo mendi gailurrera, Siongo mezularia; egin deiadar haundi, Jerusalemgo mezularia; egin deiadar, ez izan beldurrik. Esan Judako hiriei: «Hara hemen zuen Jaungoikoa. Hara, indarrez jantzita dator Jainko Jauna, eta bere besoa nagusi da. Hara, Berekin dakar saria, eta bere aurretik, irabazia. Artzainak bere artaldea bezala du zaintzen, eta bere besoaz biltzen. Axuriak altzoan ditu hartzen, eta ardi amak samurki eramaten».

**Erantzun-salmoa** (Sal 84, 9ab-10. 11-12. 13-14)

Jau - na, zu - re on - gi - nai - a e - ra - kus e - zai - gu -  
 zu, zu - re sal - ba - me - na e - mai - gu - zu.

Entzungo dut Jainko Jaunak dioen hitza:

«Bakezkoa da Jainkoaren hitza».

Hurbil zaie Haren beldur direnei salbamena:

gure lurrean Haren aintza biziko da. R/.

Onginahia eta leialtasuna elkarren bidera aterako dira,

zuzentasuna eta bakea laztanka biziko dira.

Lurretik erneko da leialtasuna,

zerutik begira egongo zuzentasuna. R/.

Jainkoak on dena emango du,

gure lurak bere uzta ekarriko du.

Zuzentasuna ibiliko da Haren aurrean,

eta salbamena Haren urratsen bidean. R/.

## Bigarren irakurgaia (2Pe 3, 8-14)

San Pedro Apostoluaren epistolatik

Senide maiteok: Hau da zuek ahaztu behar ez duzuen: Jaunarentzat mila urte bezala dela egun bat, eta egun bat bezala, mila urte. Jauna ez da berandukorra agintzaria betetzen, batzuek hala uste badute ere; baizik eta eramanpena du zuekin; ez bait du nahi inor galtzerik, guztiok bihotz-berritzea baizik. Jaunaren eguna lapurra bezala etorriko da. Orduan zeruak zaratotsez bukatuko dira; lurgaiak sutan ezereztuko dira, eta lurra eta bertako gauza guztiak kiskaliko. Gauza hauek guztiak honela ezereztu beharrak direnez gero, zeinen santu eta jainkozale izan behar duen zuen bizitzak!

Itxaron ezazue eta aurrerarazi Jaunaren egunaren etorrera; egun hartan zeruak sugarretan ezereztuko dira, eta lurgaiak erre eta urtuko. Guk, ordea, Jaunak agindu bezala, zuzentasunaren bizileku diren zeru berriak eta lur berria itxaroten ditugu.

Beraz, hauek itxaroten dituzuela, senide maiteok, ahalegin zaitetze, Jainkoak bere aurrean garbi

## Aleluia (Lk 3, 4b. 6)



Urra ezazue bidea **Jaun**arentzat,  
zuzendu **Haren** bidexkak;  
eta ikusiko **dute** guztiak  
Jaungoikoaren **sal**bamena.

## Ebanjelioa (Mk 1, 1-8)

## Homiliarako argibideak

### *Ahots bat basamortuan*

Abendualdiko Bigarren igande honetan, Joan Bataiatzailea ageri zaigu. Ebanjelioan, berak bere buruari ematen dion definizio hori azpimarratua geratzen da: «Mintzo bat oihuka ari da basamortuan: "Urre ezazue bidea Jaunarentzat"». Basamortu hitza kezkarria da gaur egun. Lurrazalaren ia %33 basamortua da. Eta proportzioa izugarri handitzen da desertifikazioaren fenomenoaren ondorioz. Urtero, landu daitezkeen ehunka mila hektarea basamortu bihurtzen dira. 135 milioi pertsona inguru urrunduta dira beren egoitza naturaletik, azken urteotan, aurrera doan basamortuan.

Baina bada beste basamortu bat: ez kanpoan, baizik eta gure barruan; ez gure hirien ertzetan, baizik eta haien barruan. Giza harremanak hoztea, bakardadea, axolagabetasuna, anonimatoa. Basamortuan, inork oihu egiten badu, ez dio inork entzuten, lur bukatuan esnatzen bazara, inork ez zaitu hurbiltzen, piztia basati batek eraso egiten badizu inork ez zaitu babesten, gozamen handia edo pena handia sentitzen baduzu, ez duzu inorekin partekatuko. Ez al da hori askotan gertatzen gure artean? Gure gizartearen ezina eta garrasia ez al da basamortuan egiten den garrasiaren modukoa?

Baina basamortu are arriskutsuagoa da gutako bakoitzak barruan daramana. Hain zuzen, bihotza basamortu bihurtzeko daiteke: idorra, motela, afekturik gabea, itxaropenik gabea, hondarrez betea. Zergatik ez dute lortzen askok lanetik ateratakoan moztea, mugikorra, irratia, musika itzaltzea? Basamortuan egoteko beldurra dute. Naturak, esaten da, hutsaren izua du (horror vacui), baina gizakiak ere hutsunea saihesten du. Zintzo aztertuz gero, ikusiko dugu zenbat gauza egiten dituen gutako bakoitzak bere burua eta errealitatea aurrez aurre ez aurkitzeko.

Komunikabideak zenbat eta gehiago ugaritu, orduan eta txikiagoa da benetako komunikazioa. Telebistari familiaren elkarrizketa itzali izana leporatzen diote, eta batzuetan hori egia da. Baina onartu behar dugu telebistak maiz betetzen duela hor dagoen hutsune bat.

Ebanjelioak, entzun dugunez, egun batean basamortuan oihartzun egin zuen ahots batez hitz egiten du. Albiste handi bat aldarrikatzen zuen: «Nire ondoren dator, ni baino ahaltsuagoa dena, ni ez bait naiz inor, makurtuta, Haren oinetakoen lokarriak askatzeko ere».

Joan Bataiatzaileak Mesias badatorrela hitz xumeekin iragarri du, (sandalien uhala, larraina, haizea, alea) baina zer eraginkor! Lan handia egin zuen: lokartutako mundua amets handi hartatik esnaraztea. Zenbat eta itxaronaldi luzeagoa izan, orduan eta neke handiagoa sortzen da, inertzia-indarra dela eta aurrera egiten badu. Zerbait aldatuko dela eta benetan espero zena iritsiko dela sinestea gero eta zailagoa dirudi.

Mendeetan zehar, itxarote horri buruz hitz egin zen: «Egun haietan...; azken egunetan...». Eta orain gizon bat aurreratzen da, eta seguru aldarrikatzen du: «Egun hura egun hau da. Iritsi da ordu erabakigarria». Berak pertsona batengana zuzentzen du behatza eta esaten du: «Hona hemen Jainkoaren bildotsa, Espirituaren indarrez mundua bataiatuko duena!» (Ik. Jn 1,29.33). Ze zirrara eragin ote zien entzuten zutenei!

Jesusek basamortua loratzeko duen modua «Espiritu Santuarekin bataiatzea» da. Espiritu Santua maitasun pertsonifikatua da, eta maitasuna da gure planetaren pixkanakako desertifikazio espirituala geldiaraz dezakeen euri bakarra.

Gertaera pozgarri bati ere arreta jarri behar diogu. Gure gizartea basamortuaren oso antzekoa bada ere, egia da basamortu honetan Espiritua oasi gisa ekimen asko lorarazten ari dela. Urte hauetan,

dozenaka elkarte garatu dira, isolamendua hausteko, gure hirietako «basamortuan» oihu egiten duten ahots ugariak biltzeko. Izen ezberdinak dituzte: «itxaropenaren telefonoa», «bide laguna», «telefono berdea», «telefono urdina». Milioika dei urtean. Bakarrik dauden pertsonen ahotsak dira, etsita daudenak, arazo handiagoak dituztenak. Ez dute dirurik bilatzen (ez da telefono-haritik pasatzen), beste zerbait baizik: ahots lagun bat, itxaropen-arrazoi bat, komunikatzeko norbait. Hariaren beste muturrean milaka boluntariok entzuten dute, giza bero pixka bat ematen saiatzen dira, eta, sinestunak badira, pertsoneri otoitz egiten, Jainkoarekin harremanetan jartzen laguntzen diete, Jainkoak laguntzen baitu.

Elkarte horietako kide ez bagara ere, guztiok egin dezakegu, gure mugekin, haiek egiten dutena. Telefonoa, hasteko, denok dugu. Ez egon beti telefonoak jo arte, norbaitek behar zaituela konturatzeko. Ireki bihotza eta hartu aurrea behar duenaren bakardaderari. Batez ere Gabonak hurbil daudenean.

### Jainkoaren herriaren otoitza

Atera gaitzen bakez datorkigun Jaunaren bidera eta egin diezaiogun otoitz:

*Erantzuna:* **Zatoz, Jauna, gu salbatzera!**



—Eliza poz handiz bizi dadin beti, eta itxaropen osoz sinets dezan Jauna gertu duela. Egigun otoitz. R/.

—Egiazko bakez bizi gaitzen, errukiaren, barkamenaren eta adiskidetzearen bidetik. Egigun otoitz. R/.

—Jaunak, Bere etorreraz, bihotz hautsiak sendo ditzan eta belaun makurtuak sendotu. Egigun otoitz. R/.

—Jainkoaren promesak fede beroz sinets ditzagun eta Beraren laguntzaz hitz emandakoak onartzeko prest ager gaitezen. Egigun otoitz. R/.

Gure atsegin zaren Jainko eta errukizko Aita, Zuk agindu diezu mundu honetan erromes diren gizakiei zeru berria eta lur berria; entzun gure otoitzak eta mintza zakizkio bihotzera Zure herriari, garbi eta leial itxaron dezagun Zure Semearen agerpena. Errege bizi baita gizaldi eta gizaldietan.

**Prefazioa: Abendualdiko 3.** (*Meza-liburua: 470. or.*)

### **Jaunartze-ondorengo otoitza**

**Eukaristiako espiritu-janari honek aserik,  
otoitz egiten dizugu, Jauna:  
erakutsiezaguzu, sakramentu honetan parte hartu dugunoi,  
lurreko gauzak zentzuz erabiltzen  
eta zeruko ondasunak maitatzen.  
Jesu Kristo gure Jaunaren bitartez.**

**Bedeinkapen Nagusia** (*Liburuxka honetan: 14. or.*)